

KONKURS ZA LITERARNE RADOVE

Javna ustanova osnovna škola "Aneks" poziva sve učenike od I do IX razreda da se prijave na konkurs za literarne radove sa temom „*Branitelji — heroji moje mahale*“. Konkurs će biti otvoren do 8. aprila 2022. godine, nakon čega će Tim za kulturnu i javnu djelatnost škole odabrati 3 najuspješnija literarna rada koji će biti javno objavljeni i nagrađeni.

Povod za objavljivanje konkursa je 15. april, Dan Armije Republike Bosne i Hercegovine, a cilj škole jeste da kod svojih učenika i na ovaj način razvija ljubav, poštovanje i osjećaj patriotizma prema jedinoj domovini koju imamo.

Dan Armije RBiH jedan je u nizu važnih datuma kojeg obilježavamo svake godine. Armija RBiH je osnovana 15. aprila 1992. godine u periodu agresije na našu domovinu. Ona je bila u tom teškom periodu naše historije jedina legitimna vojna snaga na teritoriji BiH, jedina svijetla tačka i nada u bolje sutra za sve nas, građane Bosne i Hercegovine. U njenim redovima bili su, rame uz rame, svi hrabri Bosanci i Hercegovci, bez obzira na vjeroispovijest, istinski heroji koji su hrabro stali u odbranu svoje domovine. Mnogi od njih dali su i svoje živote za slobodu u kojoj mi danas uživamo.

U čast svim braniteljima naše domovine — ne dozvolimo da njihova žrtva padne u zaborav!

Uz poziv za učešće, u prilogu učenici imaju i važne upute potrebne za rad!

Učenici radove trebaju poslati do 8. aprila 2022. na mail adresu:

tim.kjd@osaneks.edu.ba

Rezultati će biti objavljeni 14. aprila 2022. godine.

Direktor:

Omer Begović, mr.



- Upute učenicima za rad -

Literarni radovi sa temom

„Branitelji – heroji moje mahale“

Dragi učenici, pred vama je zanimljiv i lijep zadatak - da iskažete svoju volju, želju i istraživačke sposobnosti, ali prije svega ljubav i ponos koje osjećate prema svojoj domovini i njenim braniteljima! Kada ste odlučili da učestvujete u školskom takmičenju, da se posvetite ovoj važnoj temi, morat ćete prije svega biti istraživači! Činjenica da pripadate generacijama koje nisu preživjele agresiju na našu zemlju, niti direktno učestvovali u odbrani svoga grada, tjera vas da o tome morate prvo istražiti: razgovarati sa članovima svoje uže i šire porodice, komšijama i prijateljima koji su bili branitelji domovine, pitati o svemu što vas interesuje i posegnuti za činjenicama o kojima ne znate, a trebat će vam za rad!

Literarni radovi mogu biti poetskog i proznog karaktera. Oni koji vole pisanjem izražavati svoje misli već znaju da to podrazumijeva lijepo, pravilno i bogato izražavanje, protkano emocijama i sa što više stilskih izraza. I u pjesmi i u pripovijednom tekstu odaberite osobu koja vas je u prethodnom istraživačkom radu impresionirala, čija vam je priča zanimljiva, čije vas je herojstvo dirnulo – toj osobi (branitelju – heroju) posvetite svoj rad! Osim subjektivnog razmišljanja, slobodni ste da pominjete i neke objektivne činjenice (ime, godine, ostale značajne podatke).

Posebno želimo napomenuti da radovi trebaju biti vaše djelo! To znači da nam je prihvatljivo uvidjeti da ste imali pomoć u radu, ali ne i da je rad koji čitamo djelo nekoga ko se ne takmiči. Želimo uživati čitajući dječije - VAŠE radove!

Sretno!

Tim za KJD OŠ "Aneks"